

Joven boxdo profesional Leo Wester a muri tragicamente

ORANJESTAD (AAN) - Apenas 12 ora di aña 1989, Aruba a ser sacudi cu e tristo noticia tragico cu e joven boxdo Leo Wester a fayece den un accidente di brommer ariba e caminda di Kibaima na altura di Drive Inn.

Leo Rigoberto Wester a nace dia 18 di Januari 1965, casa y tata di un jiu muher di 2 aña.

Leo ta e ultimo jiu di e gran familia Wester cu ta conoci den mundo di boxeo tanto local, internacional y mundial.

Leo ta jiu di Janchi Wester y ta e ultimo di e rumannan Wester, un familia di tata y mama cu Dios a bendiciona cu 8 jiu 3 muher y 5 homber. Tur cinco ruman ta boxdo y nan a pone nomber di Aruba ariba e nivel mas halto cu nan tabata por.

Rudolf Wester, Richard Wester, Hubert Wester cu a bay Weganan Olimpico na Korea, Roland Wester, y e ultimo esta esun mas chiquito cu ta e fayecido Leo Wester.

Un equipo di boxeo cu tur a yuda otro pa asina por a mantene e nomber di e familia Wester halto den boxeo.

E noticia tristo a sacudi mundo di deporte aki na Aruba masha hopi mes. Manehador di e Jeep cu tabata involvi den e accidente tabata e gran Atleta (Judoka) Victor Maduro, esta dos atleta tabata involvi den e accidente.

Leo Wester un boxeo semper contento y confia a trece hopi emocion, accion y e publico a



biba cune durante su combatenan tanto den amateur como profesional. Recuerdonan inolvidable di e joven boxdo Leo Wester tabata su pelea contra e boxdo ganador di medaya di oro Manuel Vilchez di Venezuela kende

despues a box pa titulo mundial. Leo Wester a perde pero a enfrenta un boxdo mundial.

Mucha, mucha Leo Wester a siña tira su mannan y tur vista tabata ariba dje cu un dia lo e por bira grandi den boxeo, pero destino tabata otro, Leo a

yega te na 6 rounds aña pasa contra e boxdo Venezolano Pedro Carasco unda el a perde pa decision.

Leo Wester a box 11 pelea amateur, gana 8 pelea di cual el a gana uno pa K.O. den 2 rounds. y perde 3 di cual el a

perde 1 pa R.S.C..

Leo a cuminsa su carrera di boxeo na 1979 unda el a box dos pelea y a gana ambos. 1980 el a box 4 pelea gana 3 perde uno contra Roberto Gonzalez di Puerto Rico. Na aña 1981 Leo

Sigui lesa pag.28

Leo Wester

Cont pag.4

a box dos pelea ariba nivel internacional y a gana ambos, contra Wilfrido Jimenes di Venezuela, y contra Eric Figaroa di Puerto Rico.

Na 1982, Leo a box dos pelea y a gana uno y perde uno contra Manuél Vilchez.

Na aña 1983 Leo a box su ultimo pelea amateur contra Carlos de La Cruz y a gana pa T.K.O.

Leo su carrera profesional a cuminsa cu su prome pelea ariba nivel internacional unda el a gana pa decision den un pelea di 4 rounds for di un Venezolano. Na Sint Maarten Leo a duna un tremendo pelea pa perde pa decision den 4 rounds.

Leo a gana Elias Vrolijk pa K.O. den prome rounds aki na Aruba.

Su ultimo pelea tabata contra Pedro Carasco den un pelea di 6 rounds unda Leo a perde pa decision den Credit Union den un programa di Croes Promotion cu su promotor John Croes.

No tin duda cu e morto di Leo Wester tabata ta golpi duro pa deporte di Aruba, boxeo y mas ainda pa su mama, tata, y su rumannan y pa e cuatro rumannan boxdo cu a keda atras.

Leo Wester a bay, pero su recuerdonan lo keda semper den memoria di tur esnan cu conoce, un joven semper contento y dispuesto pa coopera, un joven di confianza pa salud di nos comunidad, debi cu su trabao ta Asistente Boticario na Botica Oduber y San Lucas.

Na familianan, amigo, conocirnan y amantenan di boxeo, DIARIO ta manda palabranan di condolencia na familianan, y cu Leo sosega na Paz.